



金州山人續稿卷之一百三十六

士贈王世貞元美著

文部

行狀

明特進光祿大夫柱國少師兼太子太師吏部  
尚書建極殿大學士贈太師謚文貞存齋徐

公行狀

上

公姓徐氏諱階字子升淞江之華亭人也其先自河  
南徙爲華亭風涇鄉人世世受耕不仕至高祖公德  
始成以仁厚喜施予閭里中呼之爲佛子徐佛子徐

有子公賢公賢子公禮皆不廢爲長者而公禮尤斤  
斤守然諸急義敦讓公禮有四子其長曰思復公薨  
少子旒思復公以文無害繇吏部選人授宣平丞再  
補寧都丞所至著廉公惠慈之政其吏民謳思之滿  
九載課最當遷竟謝去弗顧旒亦舉鄉貢有聲公車  
間徐始大思復公娶於林繼娶錢皆夭最後娶顧而  
舉公及贈太常典簿陳南京刑部右侍郎陟公賢之  
婦沈公禮之婦黃暨思復公顧夫人皆以公貴推  
恩累贈三公皆爲特進光祿大夫柱國少師兼太  
子太師吏部尚書建極殿大學士婦皆爲一品夫

天子所以褒揚隱德政術備至而宣平寧都二邑至  
爲祠以祀思復公華亭亦祀之於鄉賢如召信臣故  
事時人榮之公之舉也寔於思復公宣平官舍甫一  
歲而女奴抱公窺簪井墮焉小吏之婦號而出之則  
絕矣居三日忽蘇五歲思復公以宣平績還道括蒼  
嶺公復自輿而墮其下沈深峭石戟拒無全理顧夫  
人慟哭而已旣而衣紵於樹從容下卒不死思復公  
又嘗寘公於古剎讀書剎故多魅僧苦之公宿而魅  
不出思復公始心異公俾就外傳受小學以至四子

甫閱歲悉成誦思復公補寧都挾公以從嘗歸自他  
邑公出迎思復公戲謂公父遠迺子遠迎父子之恩  
天性也公應聲曰君居上臣居下君臣之義人  
倫哉思復公益大異公教之屬文卽工屬文十五而  
補博士弟子又二載以優等試應天不利歸于何而  
大司馬聶貞襄公豹來爲今試公而奇之曰是子  
國器也因進公以聖賢之學而公亦慨然自奮以一  
第不足名公年二十而督學蕭君鳴鳳負人倫鑒試  
公第一食於庠再試應天學士董公配得公文於黜  
而異之取以冠諸試者會有所齟齬不果然猶爲第

七人梓其文會試復在高等既

廷對大司寇林貞肅公俊得公所射策謂當第一以  
屬內閣時少師楊文忠公廷和居首揆用子嫌不預  
讀卷諸閣臣持故事謂林公所取抑居第三人 賜  
進士及第當入謁楊公獨目屬之曰此少年名位不  
在我輩下已而顧少保費文憲公宏公柰何不以衣  
鉢屬此少年費公益第一人也其後公官與二公埒  
又與楊公俱宣力 鼎革間而名壽終始則過之尋  
授翰林院編脩予告歸娶沈夫人明年八月北上當  
是時言事者以不當

上尊親意逮訊戍謫累累公行而遇故諫官安磐翰林楊慎王元凱皆狼籍血肉中公出橐裝遺之或謂有尾舟而詞者公行意自若顧獨以時事稍異有二親在身未敢許忽忽不樂至清源夜忽夢思復公帕首而名呼公者再輒心動返棹還抵彭城而計至矣公號哭馳歸敗瘠營塋明年

大慶覃恩得贈思復公如公官顧夫人爲太孺人服除次且久之乃入都復故官尋奉

命授中貴人書故授書者晏入早出一切以苟簡文具而已公曰毋易此曹此曹能償天下事於是寅而

入申而出課業必謹約禮詳說毋不欣欣傾聽時  
上嚴亡所假貸中人爲流言以不如正德時饒者公  
謂正德時何可得若曹晚不能悉舊事今雖嚴寬於  
憲孝朝多矣且正德以饒故貴人亡不用侈坐法若  
曹不覩

憲孝朝諸冢坐甲第相望耶咸拱手曰命之矣尋充  
經筵展書官俄復充

廷試受卷官預脩

大明會典再以選脩 祀儀成典益

上所最屬意以一代儀禮職編纂者不能數人而公

與焉顧首揆永嘉公緣

上意請正孔廟祀抑絀王號下儒臣議相顧攝誓無  
敢異同者公獨條具其三不必五不可狀甚哲疏上  
永嘉公盛氣召公於

朝房面詰之公徐理前說至

高皇帝盡革獄瀆號獨不革孔子號而語遜乃曰

高帝少時作耳何可據也公對曰

高帝定天下而後議禮寧少耶且聖人之文無老少  
不爾明公議

四郊何以據

高帝少作也永嘉公頰盡赤乃復謂曰爾謂塑像古  
禮否公對曰塑像誠非古然既肖而師事之久何忍  
毀也永嘉公曰程子有云一毫髮不似吾親何以親  
名之公曰有一毫髮而似吾親毀之可乎且明公能  
必

列聖之

御容無毫髮不似乎哉而何以處之永嘉公語塞則  
益怒曰若叛我公曰叛者生於附者也某故未嘗附  
明公何以得言叛他相桂文襄公翟文懿公咸爲公  
股栗勸公謝公弗應揖而出於是

上亦緣永嘉公意爲說以辨公當具疏請罪獨言不稱職當罷不言議非是有

旨外補而會他御史有繼之者下都察院論罪汪榮和公鉉綰院章復緣永嘉公意謂此邪議寔公倡之致搖國是宜正法以示天下贖具而漏之公時沈夫人病前歿獨遺二歲孤今太常卿璠家人環泣謂必死公探橐中裝得金二十枚之曰以此爲棺殮費屬其孤於鄉人李刑部日章沈進士愷曰幸歸我太夫人已而曰太夫人有陟在足養也

君父賜我死即死耳益怡然委順云亡何而少司寇

聞莊簡公淵中丞唐文襄公龍力爲解乃隱公名而  
緩其辭獄上

上亦弗問也公得添注延平府推官始公自弱冠取  
甲第爲侍從臣出一語而天下豔傳之履相踵於  
戶公意不自憚益從聶貞襄公游及同年歐陽文莊  
公德相與講求良知遺訓及以天地萬物爲一體反  
之身心而後出之不濶疎口語而已至於

國家典訓章程比詳閭閻大小利益靡不用以爲學  
而他綴羽績繡移商刻徵以駭悅耳目者舍不之取  
一旦伉慨持論從容於霆霹之下而弗爲動天下益

信公之足以大受而尚意其自 禁近出爲小官縱  
不鄙薄之有故事可以優游養重公獨不然曰宦大  
小非 王臣耶且盤根錯節所以增益我者不淺乃  
馳歸泣謝太夫人弗獲朝夕罪而單車馳之郡至則  
連攝郡事公晝夜拮据案牘清宿繫者三百人更輸  
銀法毋得落猾胥手毀淫祠剝社學取鄉所教授鄧  
柝書燔之而采宋大儒之格言諧之韻俾稍習誦俗  
翕然變時大盜窟尤溪險而四出剽郡邑勢張甚分  
巡諸僉事併欲以屬公捕而難發言公奮請身任之  
乃設方畧懸賞格以授三老窮其窟旬日而得酋首

併餘黨百二十人人以爲神滿三載遷湖廣黃州府  
同知當發其吏民以十家醢酒道傍泣稱觴公爲人  
人醢遂步至舟貽書謝父老父老相率勒之石諸生  
追送至建寧乃別抵嚴陵而提督浙江學校之命下  
其官僉事公歸拜太夫人已娶今張夫人僅八日而  
奉太夫人之浙既履任歲周行郡邑必徧大較以正  
文體端士習爲先他務鉤棘晦僻以相高者雖名士  
弗錄既唱諸生第人人爲語所以甲乙及耶見斥者  
得自名而後折之不得已而施檟楚示慘然色諸生  
人人退自快服也御史禮公脩浙通志垂成而有以

勢強之伸屈者公毅然不可乃廢第業具草遂爲後  
志張本三載改提督江西學校其官副使所募畫一  
如視浙江時而加詳密公所稱良知學本故王文成  
公守仁而文成於江西最顯著自公推行之且像文  
成而祀焉其地遂有生像公以祀者前後兩省試偕  
計士所登式半公造第一人而他亦無不優等其後  
服官政中外踐臺省以政術名者比比吏部初擬薦  
公尚寶卿國子司業太常少卿俱不果最後以皇  
太子出閣妙選官屬公爲司經局洗馬兼翰林侍讀  
以四品服俸居職公之初至江西也時相夏文愍公

言辟從子姓有欲倖進者公面撻之曰廼公居座主  
以而曹屬我誨不以而曹屬我進也夏公聞之不悅  
故於初 宮案選不及公而言官有所指列奪而屬  
之吏部許文簡公讚采物情得公遂以公應公去

國十年矣而 賜環益猶未強仕屬 承華政稍簡

得以其暇與故鄒文莊公守益羅文恭公洪先鄭端  
簡公曉趙中丞時春唐中丞順之輩相琢磨爲聖學  
益切俄而太夫人捐館公哀毀骨立悉屏謝時俗尚  
以古禮行之三載不御內是時太夫人得請 賜祭  
官爲塋矣甫服除進國子祭酒未上

上再問公何以遲遲意益有屬也公之爲祭酒下令  
諸生滿而歷事他曹者必以久次毋得用貴人居間  
置籍以稽膳銀之數謂典籍曰吾代汝弭謗也復爲  
籍籍諸生之淑慝使月朔廷誦之以吉服受淑籍素  
服受慝籍曰忝在師長毋所逃若慝也諸生人人相  
戒勉二籍矣久之擢禮部右侍郎遂遷吏部乃榜於  
壁曰咄汝階二十一而及第四十三而佐天官 國  
恩厚矣何以稱塞所不竭忠殫勞而或植黨以擯賢  
或殉賄而鬻法或背公以行媚或持祿以自營神之  
極之及於子孫吁可畏哉故事吏部大僚鑄車門所